

## **Makitibi ki dɔsay ki Pol ndangi adi Təsaloniki je**

*Ta ki dɔ makitibi ti ki dɔsay ki Pol ndangi adi  
Təsaloniki je*

Təsaloniki e ɓe ki kəte e ɓe bo ki isi dɔ made je ti, go nangi ti ki Masəduwan ki dije ki Rom isi dɔ ti. Masəduwan ki a ki jam dɔ ɓe ti ki Girəsi, kaw ki lo kibə kadi ti be.

NGa ningə, e kaw mba ti lə Pol ki ko joo ki aw mba kilə mbe Poy Ta ki Maji kin ə, ɔti Pilipi ti aw Təsaloniki, ində gin njé kaw-naa je ki Təsaloniki ti. Nə lo kadi Pol isi Təsaloniki ti ndɔ ngay goto, tado Jipi je madi ki ɔsi-e ta. E be ə, ra adi Pol əi ki Silasi, tusi Təsaloniki iyəi, ə ɔti law ba awi Bəre ti (Knjk 17.1-10). Dəkagilo ki rangi go ti nga ɓa, Timote ki təl re Təsaloniki, aw ingə Pol Koreti ti, ade poy njé kaw-naa je ade oo (1Təsa 1.6). Lo kin ti ə, Pol a ndangi-n makitibi ki dɔsay kin, kaw ki ɓal ti ki 51 je be go Jəju Kirisi ti. Njé sangi gin makitibi je əli təkɪ makitibi ti ki dɔsay ki Pol ndangi adi Təsaloniki je kin e makitibi ki ndange a e nɔ makitibi je ti ngay ki me Kilə-mindi ti ki Sigi.

Poy njé kaw-naa je ki Pol oo, ade rənəl ngay. Be ə, me makitibi ti ki Pol ndangi adi-de kin, ra oyo Luwə mbata njé kaw-naa je ki Təsaloniki ki təli ne ndaji ki maji mbata lə ndəgi njé kaw-naa je ki dɔnangi Masəduwan ti. Pol ole mede dɔ kilə ti ki e wa ra dande ti, ningə əl-de təkɪ n-ndigi ngay kadi n-təl n-oo-de tɔ (1.1-3.13). Pol ilə dingəm mede ti kadi uwəi

təgide ba nım, kadi təgi ki kəte me njiyə naa ti ki Kirisi nım (4.1-12).

Ta ki rangi, Pol əl-de ta ki də ta ti ki isi dəji-naa əji-n də ki lo koy ti lə njé koy je, ki təl ki Kirisi a təl tə re me təba ti (4.13-5.11). Pol təl ta makitibi ləne ki ndu je ki kadi njé kaw-naa je ai də ti tə, ta kuwə ji-naa tə (5.12-28).

Makitibi ki Pol ndangi adi njé kaw-naa je ki Təsaloniki ti kin, re ki me kosi nangi adi dije pəti ki isi dəji rəde ta də dəkagilo ti ki dəbəy ti. Dije ki njé kun go Kirisi ingəi me makitibi ti kin təkə əi dije ki əi me kunji ti ngata, ningə kilə ləde e ta kadi tji mede kati, mai naji lə Kirisi dəkagilo ti ki əi dənangi ti ne bəy kin. NGa ningə, ki əji də ndə ki Kirisi a re-n, dəw ki gər goto. Nə ta ləde e kadi indəi mede ti təkə Kirisi a re nqə, ə ndə ki tēg pati ba, a indəi bə naa ti sie (4.17).

### *Kuwə ji-naa*

<sup>1</sup> Mi Pol, naa ti ki Silasi əi ki Timote<sup>☆</sup>, ə ji ndangi makitibi kin j-adi səi njé kaw-naa je lə Luwə ki Bawje əi ki Bəbe lə Jəju Kirisi, ki isi Təsaloniki ti<sup>☆</sup>. Kadi me-maji ki kisi-maje lə Luwə e naa ti səsi.

### *Pol ra oyo Luwə mbata kadi-me lə Təsaloniki je*

<sup>2</sup> Ji ra oyo Luwə ki ndə je ndə je mbata ti ləsi pəti, loki j-isi j-əl ta ləsi Luwə taa taa, me kəl ta ti sie. <sup>3</sup> Ta kəm Luwə ti ki Bawje, meje isi ole də kadi-me ti ləsi ki isi kəm, ki ndigi-naa ləsi ti tingə bil, ki kuwə təgi ba me kində me də Bəbe ti ləje Jəju Kirisi<sup>☆</sup>. <sup>4</sup> Tadə ji gər maji kadi Luwə kəti səsi, səi ngakoje je ki ndigi səsi. <sup>5</sup> Təkə rəjeti, Poy Ta ki Maji ki j-ilə mbeə dansi ti, e

☆ **1:1** Knjk 15.22; 16.1    ☆ **1:1** Knjk 17.1-9; 1Təsa 2.1-2    ☆ **1:3** 1Kər 13.13

me ta ki kəl ti par al, nə e ki tōgi, ki me ki kare ki NDil Luwə adi-je. Səi, igəri pa njiyəje ki ji njiyə-n dansi ti mbata maji ləsi kin bəti. <sup>6</sup> Ningə səi je, indaji-je nim, indaji Bəbe nim, tadə itaai ta lə Luwə me kə je ti ki ngay. Itaai ki rənəl ki NDil Luwə adi səsi☆. <sup>7</sup> Lo kin ti, itəli ne ndaji mbata ti lə njé kadi-me je ki dənangi Masəduwan ti☆ ki dənangi Akay ti☆. <sup>8</sup> Ka ta lə Bəbe ba j rəsi ti, tē dənangi Masəduwan ti ki dənangi Akay ti par al, nə poy kadi ki adi mesi Luwə kin sane ki lo je pəti. Sane sane ki j-aw ki ndoo kadi j-əl tae bəy taa al. <sup>9</sup> Di je kare kare əli ta ki dəje ti oji-n də kuwə ki uwəi-je ki rəsi ti, ki təl ki itəli gidisi adi kagi yo je ləsi, ə itui kəmsi də Luwə ti ki rəjeti, ki nje kisi kəm ba, kadi irai bəə lie kin. <sup>10</sup> Irai bəə lie, inginəi ngone ki j dərə ti, ki un-e dan njé koy je ti taa. NGone Jəju ki nje taa je ta wongı ti ki a re.

## 2

### *Kilə ki Pol ra Təsaloniki ti*

<sup>1</sup> NGakom je, səi je wa igəri maji kadi e kare ki ndangi ə j-aw-n rəsi ti al. <sup>2</sup> Taa igəri maji bəy tə kadi kəte nə kawje ki rəsi ti, di je adi-je kə je taji-je je Pilipi ti, nə be ka Luwə adi-je tōgi adi j-ilə-n səsi mbə Poy Ta ki Maji me rə je ti ki ngay☆. <sup>3</sup> Təki rəjeti, ta lə Luwə ki j-isi j-ilə səsi mbəe, ngire e də ne ki go ti al ti al nim, e də rəbi ne ki ay njay al ti al nim, taa ji sangi rəbi kadi ji tə dəw madi al nim tə. <sup>4</sup> Ningə, e Luwə ə oo-je kadi j-asi, ə ilə Poy Ta ki Maji jije ti kadi j-ilə mbəe. NGA ningə, j-ilə mbəe kilə ki kadi ji nəl-n dəw al, nə kadi nəl Luwə ki nje koo ngəme

☆ 1:6 Knjk 17.5-9 ☆ 1:7 2Kər 1.16 ☆ 1:7 2Kər 1.1 ☆ 2:2 Knjk 16.19-24; 17.1-9

dəw kərə kərə. <sup>5</sup> Səi je wa igəri maji kadi ndə kare j-əl səsi ta ki ji to-n səsi pe pe al jagi, taa ji tə səsi ki taje kadi j-ingə-n ne madi jisi ti al nim tə. Lo kin ti, Luwə asi kadi ma naji ləje. <sup>6</sup> Ji sangi kadi dəw piti je al, ji sangi piti ləsi al nim, ji sangi piti lə dije madi ki rangi al nim tə. <sup>7</sup> Ningə ki rəjeti, ke je njé kaw kilə je lə Kirisi kin, asi kadi j-a j-ində-n təgi dəsi ti, nə loki je dansi ti, ji təl ji səl ləm ləm. Ji ra rəje tə kə ngan je ki isi ində kəmne go ngane je ti, isi ngəm-də be. <sup>8</sup> Ji ndigi səsi ndigi ki je-n bəsi kadi j-adi səsi Poy Ta ki Maji lə Luwə par al, nə je bəsi kadi j-un rəje wa j-adi səsi. Səi, itəli ne ki gate e ngay ki rəje ti.

<sup>9</sup> M-gər kadi mesi a ole də kə ti ki j-ingə me kilə ki ra ti ki də kə rəgəgə ti ləje. Ji ra kilə kondə je, kada je kadi ji təl ne ki əy də dəw madi ti dansi ti al. Ji ra be ə j-ilə-n səsi mbə Poy Ta ki Maji lə Luwə. <sup>10</sup> Asi kadi imai naji ləje, taa Luwə ka asi kadi ma naji ləje tə təkə, pa njiyəje ki rəsi ti səi ki adi mesi Kirisi, e pa njiyə ki ay njay, e pa njiyə ki dana, ne ki kadi dəw a ində-n ta dəje ti goto. <sup>11</sup> Igəri kadi, kare, kare pəti, ji ra səsi təkə baw ngan je a ra-n ngane je be. <sup>12</sup> J-ilə dīngəm mesi ti, j-adi səsi təgi, taa ji dəji səsi ki nja naa ti ki nja naa ti kadi pa njiyəsi e pa njiyə ki təji kadi səi dije lə Luwə. Luwə ki bə rəsi kadi indəi rəsi naa ti səne də kəbe ti ki də təbə ti ləne.

### *Kadi-me ki kə ki ingə dije ki Təsaloniki ti*

<sup>13</sup> Gin ne ki j-isi ji ra-n oyo Luwə ki ndə je ndə je ə to kin: loki j-ilə səsi mbə ta lə Luwə ə osi mbisi ti, itaai ta kin tə ta lə dəw par kare al, nə itaai təkə e-n ta lə Luwə təkə rəjeti. Ningə ta kin isi ra kilə mesi ti səi ki adi mesi Kirisi. <sup>14</sup> NGakom je, səi uni də nja njé kaw-naa je lə Luwə, ki adi mede Jəju Kirisi, ki isi

Jude ti. Ingəi kə jə ngakosi je ti ki be koji-si ti, ko kə ki əi je ingəi ji \*Jipi je ti✧. <sup>15</sup> Jipi je ki təli Bəbe Jəju ki njé kəl ta je ki ta Luwə ti, taa je ka adi-je kə tə. Kılə rade nəl Luwə al, ningə əi njé bə je lə dije pəti✧. <sup>16</sup> J-ilə mbə Poy Ta ki Maji dije ki əi Jipi je al, kadi ingəi kaji, nə əgi-je. Ta təl tae ti, wongi lə Luwə osi dəde ti.

### *Pol ndigi kadi n-təl n-aw Təsaloniki ti bəy*

<sup>17</sup> NGakom je, ki əji dəje, j-iyə səsi dəkagilo ki ndəy be, ningə je say səsi, kəmje ə oo naa al, nə meje e naa ti. Ji sangi ki rətije kadi ji təl j-o səsi, tadə j-aw ki bosi ngay. <sup>18</sup> E mbata kin ə, ji sangi kadi j-aw rəsi ti, ningə mi Pol wa ki dəm, m-sangi rəbi nja ngay, nə \*Sata ilə kagi noje ti. <sup>19</sup> Ne ki e ne kində me də ti ləje, ne rənəl ləje, jəgi kəsi-gon ki j-a j-ində-n guje nə Bəbe Jəju ti ndə re ti e səi kin. <sup>20</sup> Təki rəjeti, səi ə səi ne təba ləje ki ne rənəl ləje.

## 3

### *Timote aw kilə Təsaloniki ti*

<sup>1</sup> J-asi kadi j-ore meje, ji nginə biti al, adi j-unduje kadi j-isi ki karje ba Atən ti✧, <sup>2</sup> ə j-ilə ki ngokojə Timote, ki e madi-kiləje me kilə ti lə Luwə, əji-n də kilə mbə Poy Ta ki Maji lə Kirisı, kadi adi səsi təgi, ə ilə dıngəm mesı ti me kadi-me ti ləsi. <sup>3</sup> E be mba kadi dəw madi dansı ti iyə rəne adi kə ki basine isi ingəi kin dum dəe al. Tadə səi je wa igəri maji kadi e ne ki səbi dəje kadi a ra-je. <sup>4</sup> Dəkagilo ki ndə ki je-n səsi bəy, j-əl səsi j-ə nə dije a indəi kəmje ndoo, ningə e nee ka kin ə isi ra ne kin, adi e ne ki

✧ **2:14** Knjk 17.5-6 ✧ **2:15** Knjk 9.23-29; 13.45, 50; 14.2, 5, 19; 17.5, 13; 18.12 ✧ **3:1** Knjk 17.15-16

igəri maji. <sup>5</sup> E mbata kin ə, tə ka ki m-ası kadi m-ore mem, m-nginə bitı al, m-ilə Timote ki rəsi ti kadi dəji ta də kadi-me ti ləsi oo. M-əəl kadi su ədi səsi, adi kə ləje təl ne ki kare rəje ti.

<sup>6</sup> Nıngə ki basine kin, Timote təl rəsi ti re tēē rəje ti ne<sup>☆</sup>, ə adi-je Poy Ta ki Maji ngay oji də kadi-me ləsi ki ndigi-naa ki to dansi ti adi j-o. Timote əl-je təkı mesı to dəje ti maji ngay ki ndə je pəti, taa əl-je bəy kadi indigi ngay kadi oi-je təkı je ka j-isi sangı ngay kadi j-o-n səsi ka kin be tə. <sup>7</sup> Lo kin ti ngakom je, me ndıngə rə je ti, ki me kə je ti ləje pəti, j-ıngə təgi rəsi ti ki takul kadi-me ləsi. <sup>8</sup> Ki basine kin, ji təl j-ıngə təgi kisi kəm, tadə uwəi təgisi ba me kində rə naa ti ki Bəbe. <sup>9</sup> Ji gər ne wa ki kadi ji ra taa kadi ji ra-n oyo Luwə ngay mbata ti ləsi, oji də rənəl ki adi j-ıngə ta kəm Luwə ti kin, al. <sup>10</sup> Kondə ki kada, j-isi ji dəji Luwə ki rətije kadi adi-je ta rəbi adi ji təl j-o-n səsi, ə kadi ji təl-n ta ne ki du səsi me kadi-me ti ləsi tə.

<sup>11</sup> Kadi Luwə ki Bawje ə wa, əi ki Bəbe ləje Jəju Kırısi, tēēi ta rəbi ki kaw rəsi adi-je. <sup>12</sup> Nıngə kadi Bəbe ra adi ndigi-naa ki to dansi ti, ki ndigi ki isi indigi dije pəti kin aw ki kəte kəte, to tə ndigi ki je j-isi ji ndigi səsi kin be tə. <sup>13</sup> Taa kadi Luwə adi səsi təgi ngamesi ti, kadi ndə ki Bəbe Jəju a re ki dije ləne bə, kadi ayi njay, ta goto dəsi ti noq Luwə ti ki Bawje.

## 4

### *Pa njıyə ki nəl Luwə*

<sup>1</sup> NGakom je, də ndəgi ta je ti, ji ndo səsi pa njıyə ki kadi injiyəi kadi nəl Luwə, nıngə e pa njıyə ka kin tə ə isi injiyəi, nə ji təl ji dəji səsi bəy, taa j-ilə dıngəm

☆ 3:6 Knjk 18.5

mesi ti me tə Babe Jəju, kadi irai adi maji ki də made ti bəy. <sup>2</sup> Səi, igəri ne ndo ki j rə Babe Jəju ti ki j-adi səsi kin maji. <sup>3</sup> Ne ki Luwə ndigi rəsi ti, e ta kadi ayi rəsi njay, əgi rəsi sangi-naa kaya ti. <sup>4</sup> Kadi dəw ki ra dansi ti, gər lo kisi ki dəne ki go rəbi ki ay njay, ki adi kəsi-gon, <sup>5</sup> ki kanji kadi ngur darə aw sie adi ra ko ne ki dije ki gəri Luwə al isi rai kin. <sup>6</sup> Ki əji də lo kin, kadi dəw madi ra majal ki ngokone ə se kadi əde al, tadə dije ki njé ra ne ki be kin, bəe a uwə-de ki rə Babe ti, adi j-əl səsi kəte, ə ji təl j-əl bəy ngata. <sup>7</sup> Tadə Luwə bar-je kadi j-ayi njay, bi bar-je mba kadi ji sangi-naa kaya ti al. <sup>8</sup> E be ə, dəw ki əsi ne ndo kin ngərəngi, e dəw ə əse ngərəngi al, nə e Luwə ə əse ngərəngi. Luwə wa ki nje kadi səsi NDilne kin.

<sup>9</sup> Ki əji də ndigi ki kadi ngakonaa je ndigi-naa, awi ki ndoo kadi ji ndangi makitibi də ti j-adi səsi al, tadə səi je wa, Luwə əji səsi rəbi ndigi-naa dansi ti yo ki ne adi igəri. <sup>10</sup> Ningə e ka tə ə isi əji ki rə ngakoje je ti pəti ki dənangi Masəduwan ti ki tae ba kin<sup>☆</sup>, nə ngakom je, j-ilə dīngəm mesi ti kadi irai adi maji ki də made ti wa bəy. <sup>11</sup> Kadi ne ki uwə mesi ngay, e kisi ki naa ki lapiya, kadi dəw ki ra dansi ti ore kəmne də kilə je ti ləne, ningə kadi irai kilə ki jisi səi je wa ə ingəi ne. <sup>12</sup> Lo kin ti, dije ki əi njé kadi-me je al, a piti səsi me kilə rasi ti, ningə a awi ki ndoo ne madi ki to rəsi ji dəw madi ti al tə.

*Njé koy je ki njé kisi kəm je ndə təl Babe ti*

<sup>13</sup> NGakom je, ji ndigi kadi isi day də ta ti ki də njé koy je ti al. Kadi isi day, indingəi rəsi tə ndəgi dije ki

☆ 4:10 2Kər 1.16

awi ki ne kində me də ti al kin al. <sup>14</sup> Tə ka ki j-adin meje kadi Jəju oy, ə i lo koy ti ka kin ə, j-adi meje kadi njé ki oyi me kində rə naa ti ki Jəju, Luwə a unde lo koy ti ki Jəju. <sup>15</sup> Ningə ta ki kadi j-əl səsi ə to kin, e ta lə Babe. J-əi ki j-a j-isi kəm ba ndə təl Babe ti, j-a j-aw dərə ti noo njé ki oyi ti al. <sup>16</sup> Tadə loki ndu nje kun də malayka je, ki ndu təbi lə Luwə a ba ba, Babe wa a i dərə ti taa re, ningə dije ki adi mede Kirisi ki oyi, a ii lo koy ti kəte, <sup>17</sup> nga ningə go ti ba, j-əi ki j-isi ki dəje taa bəy, Luwə a əy-je naa ti səde me kil ndi ti, kadi j-ingə Babe me nəl ti, ngadan lo ti. Lo kin ti, j-a j-isi naa ti ki Babe ki ndə je ndə je☆. <sup>18</sup> Maji kadi iləi dingəm me-naa ti yo je ki ne je ki ta je kin.

## 5

### *Kisi də nja ti nginə-n ndə təl Babe*

<sup>1</sup> NGakom je, ki oji də də kadi ki dəkagilo ki kadi ne je kin a rai ne, awi ki ndoo kadi ji ndangi makitibi də ti j-adi səsi al. <sup>2</sup> Səi je wa igəri maji ngay kadi ndə lə Babe a re tə nje bogi ki a re bogi ti kondə kin be. <sup>3</sup> Loki dije a əli əi nə: «Lapiya to ngata, j-isi maji ngata!» kin ba, e ə tuji a tēē ibə-de nangi busi, təkəi ndoo ki a ra-n dəne ki nje səm kin be. Ningə dəw ki a asi kadi tēē ay ta ne ti kin goto. <sup>4</sup> Nə səi ki səi ngakom je, isi me til ti ba ne kin a ibə-n səsi nangi busi tə nje bogi ki a re be al. <sup>5</sup> Tadə pəti, səi ngan je ki me kunji ti, səi ngan je ki kada. J-əi dije lə lo ki kondə al nim, j-əi dije lə til al nim tə. <sup>6</sup> Ə adi ji toi bi tə ndəgi dije be al, adi j-isi kəm, j-adi kəmje aa. <sup>7</sup> NJé to bi je, toi bi kondə, ə njé kay kasi je, kasi ra-de

☆ 4:17 1Kor 15.51-52



kondə tə. <sup>8</sup> Nə j-əi ki j-əi dije lə lo ki kada, səbi kadi j-əi njé kəm-kaa je. Adi j-uni kadi-me əi ki ndigi-naa tə nda də bədi je, ə kində me də kaji ti tə jəgi taa ne kati dəje ti tə. <sup>9</sup> Tadə Luwə ɓar-je mba kadi wongi lie ində-je al, nə mba kadi j-ingəi kaji ki go rəbi lə Bəbe ləje Jəju Kirisi. <sup>10</sup> Kirisi ki oy mbata ti ləje, mba kadi re j-isi kəm ba, ə se j-oy ka, ji təl j-ində ɓe naa ti sie. <sup>11</sup> E mbata kin ə, maji kadi iləi dingəm me-naa ti je, irai ki naa je kadi itəgi me kadi-me ti ləsi, ki yo je ki ne je, təkisi irai ngata kin be.

*Ta kəji ki dəbəy ti ki kuwə ji-naa*

<sup>12</sup> NGakom je, ji dəji səsi kadi oi to dije ki isiri rai kilə dansi ti, adi e njé ki isiri indəi kəmde gosi ti ki go ndu Bəbe ti, isiri ndəji səsi kin. <sup>13</sup> Maji kadi itəji-de ge ki igəi ta ləde ki taga wangi ki ndigi-naa adi-de gəri, mbata kilə ki isiri rai. Maji kadi isiri ki naa ki lapiya dansi ti.

<sup>14</sup> NGakom je, ji dəji səsi kadi indəri mbi dije ki isiri njiyəi biriri, iləi dingəm me njé ki mede tujji ti, əsi gin njé ki təgide goto, ə isiri də ti ki dije pəti. <sup>15</sup> Kadi oi maji, kadi dəw madi igə kirə majal ki made ra sie ki majal al, nə kadi adi kəmsi e go maji ki ra ti ki ndə je pəti. Irai maji ki naa dansi ti səi je wa nim, ki rə dije ti pəti nim tə.

<sup>16</sup> Adi rəsi nəl səsi ki ndə je pəti, <sup>17</sup> əli ta ki Luwə ki kanji kiyə tae, <sup>18</sup> irai-e oyo me ne je ti pəti. E kin ə e ne ki Luwə ge rəsi ti, səi ki indəi rəsi naa ti ki Jəju Kirisi.

<sup>19</sup> Ningə maji kadi, NDil Luwə ki isiri mesi ti kin, əgi-e al, kadi ɔr səsi ta rəbi, <sup>20</sup> taa ta ki njé kəl ta je ki ta Luwə ti əli ka, kadi ikidi al tə. <sup>21</sup> Nə kadi indəi

manji ne je pəti, ba uni ki maji dan ti. <sup>22</sup> Ūgi rəsi ra majal je ki dangi dangi.

<sup>23</sup> Maji kadi Luwə wa ki nje kadi dije lapıya, ər səsi ki tae ba, ində səsi ta dangi mbata ti lie. Ningə kadi ngəm ndılsı, ki rəsi, ki darəsi, kadi ndə təl Bəbe Jəju Kirisi ti ə, awi ki ta dəsi ti al. <sup>24</sup> Luwə ki bar səsi a də njane ti, adi e e wa bəy ə a ra ne je kin.

<sup>25</sup> NGakom je, əli ta ki Luwə mbata ti ləje. <sup>26</sup> Uwəi ji ngakoje je pəti ki kuwə-naa ki rə ti rututu.

<sup>27</sup> M-dəji səsi me tə Bəbe Jəju Kirisi ti, kadi itidəi makitibi kin mbi ngakoje je ti pəti.

<sup>28</sup> Ningə kadi me-maji lə Bəbe Jəju Kirisi e naa ti səsi pəti tə. Amen!

## **KĒLƏ-MĪNDĪ KĪ SĪGĪ**

### **New Testament in Bedjond (CD:bjv:Bedjond)**

copyright © 2011 Wycliffe Bible Translators, Inc.

Language: Bedjond

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Bedjond

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-01

---

PDF generated using Haiola and XeLaTeX on 21 Feb 2024 from source files  
dated 29 Jan 2022  
a4f34a03-c89e-55e0-bc3f-22f7829df823